

# Rätschwyber Zunft Olten



## Proklamation

wenn d'Gugge of dr Gass e Bombestimmig mache  
mit schöne Kläng ond Härze wo Lache  
Wen eg s'Monschter dörf dirigiere am Gugge Obe  
Und mi be däm grosse Finale richtig cha ustobe

Denn ghörsch Spettacolo Confetti - met Klang & Magie  
Eusi Fasnacht tönt – si chönnt ned schöner si

Wenn ar Naareparty di jonge Partygänger schwofe  
Ond am Zischtig d'Konfettischlacht abgoht vo de Gofe  
D'Naare im Stadttheater d'Seniore aheize  
D'Sänger ihri Rondine träie e de Oltner Fasnachts Beize  
Wenn ar Insieme Party d'Begeischerig riesig isch  
Ond du ir Alpe Stobe inere grosse Fasnachtsfamilie bisch

Denn gspürsch Spettacolo Confetti – all Generatione si derbi  
Fasnacht verbindet – si chönnt ned schöner si

Wenn d'Helge d'Pointe ontermale i allne Facette  
d'Koschtüm vo eus Naare dekoriert si mit Plaggette  
am Latärnefescht die gmoete Koschtwärd erstrahle  
Eg mim Nochber - unerwartet im Koschtüm - es Bierli zahle  
Weni gseh wie di detailverliebte Wäge ir Sonne funkle  
Am Trummler & Pfyffer Umzug d'Latärne lüchte im Dunkle  
Bilder, Koschtüm, Latärne, Wäge  
Si rede alli - ohni - dass si öppis säge

Denn gsehsch Spettacolo Confetti – so lüchtend ond hell  
Fasnacht strahlt – grossartig und originell

Wenn am Mäntig im Zält all Naare dorender singe  
ond d'Party erscht am Morge löi lo usklinge  
Wenn ufem Heiwäg e Guggemusig schpilt för de ganz elei  
S'letschte Glas Wy trinksch scho chli schwach uf de Bei

Denn schmöcksch Spettacolo Confetti – mit Melancholie  
D'Fasnacht schprüeit – si isch leider viel z'schnäll verbii

Drom liebi Naare - gniessed jede einzigartigi Moment  
So wärde euch die gschänkte Minute so richtig presänt  
lueget häne ond gsäit i däm wo passiert s'Schöne schrahle  
Das alls si chlini Spektakel wo me ned cha zahle

Mer wei jetzt – trommle, pfyffe, trompete, gitarrele und singe  
Eusi Inschtrumänt & Stimme zum Klinge bringe  
Die vielfarbige Spettacolo Confetti in Eleganz lo ufläbe  
Und de Zauber vo de Fasnacht in der Luft lo schwäbe

Eg liebe d' Oltner Fasnacht ond Euch mit Lieb & Seel  
Euche Obernaar

Dä aschträngendi Ufschtig – brucht chli Gschick  
Entschädige tuet e wunderbare Blick  
Eg ha höt s'Zepter vo Olte dörf öberneh  
Ond freu mi, luut und loschtig, ei Woche lang Vollgas zgä.

Eusi Stadtröt hei viel Projekt of erem Tisch  
Drom send si - chum im Amt - gli nöm so frisch  
Schnuerschtraks han eg dene Froue ond Manne  
Gsondeheitsferie verordnet – om chli uszschpanne  
Die Stöuverträtig ar Fasnacht esch set Johre klar  
E dere Zit regier eg - Rahel - als Obernaar!

Eg verschriebe euch allne e farbig, fröhlechi Zit  
Wos zauberhafts Spettacolo und tonnewiis Confetti git  
Wo Spass ond unvergässlechi Momänt eus bringt  
und jede Tag viel Musig mitschwenget.

Willkomme i eusere Zirkus Zauber Wält  
Wo Wert no zelle ond ned nor Gäld  
Ihr sind i dere Woche mini Artische  
und faszinierende Hauptprotagonische

Fertig mit lamentiere über vegani Gricht  
Oder lang haltbari Lippeschift  
Über Bäscheler und Wirtschaftskrise  
Nach de Sterne griffe - esch mini Devise

Die magische Momänt wott eg is Rampeliecht schtelle  
Genau die sinds nämli, wo im Läbe zelle  
Es sind nid die tüüre, grosse Sache  
Wo eusi Fasnacht so liebeswärt mache  
Im Chline liet d'Freud, wo mir wei erwecke  
Aber ou s'Grosse duet chlini Schönheite verstecke.

Wenn am Chinderumzug de Chlinschte ihri Auge glänze  
wägem Koschtüm, em Riis ässe und de Gugge wo schränze  
Wenn am Schmudo di Schatz en Schnitzelbank solo singt  
und er di bim Obernaare Apéro küsst ond id Arme nimmt

Denn passiert Spettacolo Confetti - mit Zauber & Poesie  
Eusi Fasnacht läbt – si chönnt ned schöner si

Wenn im Ring d'Sänger ihri Stimmbänder strapaziere  
Bim 4 Stazioni di Ufrättende mit ihrem Programm brilliere  
im Tiger 15 Gitarre de Lauenensee klampfe  
d'Trommler & Pfyffer musizierend im Glichschritt stampfe